

Politica agrara ston ins sparter dal commerzi internaziunal

In discurs cun il president dals purs avant la debatta agrara

CUN MARKUS RITTER
HA DISCURRÌ CLAUDIA CADRUVI / ANR

■ Il glindesdi stgadainan il purs en il cussegl naziunal. Els n'èn betg d'accord cun il rapport agrar da cusseglier federal Johann Schneider-Ammann. L'anr vul savair daco e dacum ch'els vulan renviar il rapport. Il president da l'Unìun purila svizra e cusseglier naziunal Markus Ritter dat pled e fatg.

En la NZZ ha Schneider-Ammann ditg ch'el less metter en pe insatge bun ensemen cun ils purs avant che sortir dal cussegl federal. Sche Vos dastgasas giavischar, tge fiss quai?

Markus Ritter: Jau giavisch il medem sco las famiglias da purs en las davosas duas retschertgas, numnadain stabilitad e cuntinuitad tar las cundiziuns da rama. Ina famiglia da purs investescha blers daners en ses manaschi. Perquai èsi impurtant da savair co che la politica agrara cuntinua ils proxims onns.

Il rapport tschenta vials per la proxima refurma agrara

Betg ch'ins subvenziuneschia ina giada pli fitg il latg e suenter puspè da main?

I na va betg ch'ins vegn mintga quatter onns cun novas leschas e novs instruments che mettan en dumonda las investiziuns ch'il pur ha fatg. Per exempel sch'ins mida la prescripziun da ladim ed il pur ha tuttenina memia bler ladim u sch'ins mida las prescripziuns per la protecziun d'animals.

In exempel concret?

Per ils pors avain nus il settember la realisaziun definitiva da las novas prescripziuns da protecziun. Uschia dovri dapli



Malizius ed endinà – il cristiandemocrat Markus Ritter politisescha cun inschign per ils purs e lur famiglias.

plaz per ils pors. Gliez ha consequenzas directas per in manaschi.

L'emprim sto il pievel decider davart las iniziativas pendentas

Vul quai dir ch'in manaschi da pors ch'ha gist bajegià novs uigls sto uss disponer enturn?

Na, lez ha savì quai ad uras. I pertutga manaschis ch'han fatg investiziuns avant 15 u 20 onns. Ma i sa tracta haltad investiziuns che dovan in tschert temp per l'amortisaziun.

Tge è il giavisch pli urgent dals purs da muntogna?

Il pli urgent dovan lezs uss bell'aura ed ina buna stad ch'els possian ir ad alp. Da preschent è la politica agrara gnanc uschè mala per ils purs da muntogna. Els han l'interess ch'i va vinavant en questa rama ed els han plaschair sch'ils pretschs da latg e da charn èn buns.

En la debatta dal glindesdi vai per il rapport agrar. Vos lais renviar quel? Pertge? Igl è gea mo palpìri.

Il rapport tschenta ils vials strategics per la proxima refurma agrara. Cunzunt las cumponentas internaziunales – là nua ch'i va per il commerzi liber – muntan decisziuns rigurusas. En il rapport scriva il cussegl federal ch'el veglia a media vista, vul dir fin il 2026, sminuir la differenza da pretschs tranter l'exteriur e la Svizra per 30 fin 50 pertschient sin noss products. Finzialmain n'è quai betg da surventscher.

Ma decisziuns concretas na cuntogna il rapport naginas?

Bain, sin pagina 59 ha il cussegl federal descrit quest plan ed el ha era ditg ch'il parlament possa prender posiziun. Sch'il parlament na s'exprima uss betg e prenda mo enconuschientscha dal rapport, lura sa splega la proxima refurma agrara sa chapescha en questa guisa. Ins sto perquai agir ad uras.

Vos vulais renviar il rapport. E tge duai capitar suenter?

Nus faschain quatter pretensiuns concretas. Tant la cumissiun dal cussegl naziunal sco era quella da la chombra pitschna pretendan che la politica agrara sto en l'avegnir vegnir separada da la politica da commerzi internaziunala. La raschun: L'agricultura en Svizra dova stabilitad e cuntinuitad. Il commerzi internaziunal perencunter è fitg dinamic, là na san ins betg tge che capita en in mais u tge che vala en in onn. Gist ils Stadis Unids èn daventads in factur plain intschertezzas.

Il cussegl federal vul sminuir la differenza da pretschs per 30 fin 50 pertschient

E las trais autras pretensiuns?

Sco segund duvrain nus ina analisa da l'actuala refurma agrara che marscha dapi il 2014. Tge funcziuna, tge betg? Sco terz duvrain nus cleras decleraziuns co ch'il nov artitgel costituziunal – ch'il pievel ha acceptà l'atun passà cun 78 pertschient da las vuschs – vegn mess enturn. E sco ultim vegnan proximamain differentas iniziativas en votaziun, per exempel «per aua da baiver schubra», «per fair food» u «per la suveranità alimentara». Questas iniziativas influenzeschan la politica agrara e qua sto il pievel l'emprim decider avant ch'ins prenda a maun la proxima refurma.